

清

史

稿

沈兆霖

曹毓英

許乃普

趙光

朱嶠

李函

張祥河

羅惇衍

鄭敦謹

龐鍾璐

沈兆霖字朗亭浙江錢塘人道光十六年進士選庶吉士授編修十九年大考二等二十五年遷司業二十六年遷侍講入直上書房授惇郡王讀二十九年遷侍講學士直南書房歷詹事內閣學士咸豐二年擢吏部侍郎督江西學政三年粵匪自武昌下九江兆霖請速援南昌上詔以軍事兆霖奏言江西會城雖暫可無慮賊擾外府省兵不能兼顧外府各有團練如肯齊心協力何藉分兵即如撫州鄉團不下數萬皆留保本村官兵祇三百已調赴會城如團練不能合力賊至何以禦之其故皆因堅壁清野舊議祇守本村並不出戰不知事

與嘉慶間川楚教匪不同川楚教匪劫掠村莊自以堅守堡寨爲是今賊專攻省會郡縣城池城既破鄉勇亦相與解散矣撫州如此各省各府亦必皆然乞飭直省當於練勇中精選十之二三聯爲鄉兵統以練達有位望之人遇本縣有警互相救援其外府外縣仍不得調往以免擾累得旨允行尋以病乞罷五年病痊署吏部侍郎仍直南書房兆霖疏言安徽各郡江北安慶和江南池太皆爲賊踞巡撫駐廬州東北徽甯廣三屬幾爲巡撫號令所不及事急則向浙江請餉事平則漕查如前不加整飭旋收旋失糜餉殃民臣察徽甯二府山川險固地皆可守民亦健奮歛休甯二縣尤多富民宜於皖南設大員專轄四府一州庶以飭吏治固民心度險設防皖撫得專心於江北浙撫亦不至牽制於皖南疏下廷議改池太道爲皖南道得專摺奏事如福建臺灣道例從之尋兼署工兵二部六年授吏部侍郎調工部復調戶部八年命往通州察覈通濟庫奏請如戶部三庫例以倉場侍郎兼管佩印鑰著爲令九年擢左都御史十年署戶部尙書七月英吉利法蘭西兵內犯兆霖疏請專講守禦勿汲汲言撫九

月授兵部尚書撫議既定上猶駐熱河兆霖與諸大臣奏請回鑾上命待明年兆霖復奏請明年春融即啟蹕還京尋調戶部十一年穆宗迺鑾即位命充軍機大臣甘肅西甯撤回爲亂總督樂斌遣提督成瑞率兵討之逗撓不進樂斌用西甯辦事大臣多慧議招撫亂久未定上命兆霖偕尚書麟魁往按蓋發樂斌等賄徇貽誤狀樂斌戍新疆成瑞多慧逮京治罪同治元年命兆霖署陝甘總督親督兵自碾伯進擊撤回屢敗之撤回乞降七月師還次平番二道嶺清兩雹山水驟發兆霖及從行兵役並沒水退得兆霖尸猶端坐輿中布政使恩麟以聞上深惜之賜卹贈太子太保諡文忠

曹毓瑛字琢如江蘇江陰人道光十七年拔貢授兵部七品小京官遷主事充軍機章京二十三年舉順天鄉試再遷郎中咸豐十年擢鴻臚寺少卿時江南大營潰總督何桂清棄常州蘇常相繼陷毓瑛疏陳軍事略曰拯溺救焚其事宜急而不宜緩擣虛批元其事宜合而不宜分臣前讀都興阿奏擬自英山由豫境繞赴徐宿以達江北而曾國藩通籌方略擬分三路進剿俟八月大舉竊

謂都興阿由豫境以達江北程途紆遠非兩月不能到浙江自蕭翰慶陣亡江
長貴自平望退守銳氣盡消以屢潰之虜兵禦剛悍之勦賊待至八月松太杭
嘉湖諸郡勢將瓦解蔓延愈廣規復愈難爲今計者都興阿宜自英霍取道臨
鳳以抵江北不過旬日即由通泰渡江直抵江陰進攻常州無錫爲一路而以
周沐潤所募沙勇副之鎮江見有兵萬餘巴棟阿馮子材向奎迺規丹陽爲一
路薛煥在上海增募勇丁萬人由嘉定太倉崑山進攻蘇州爲一路而命張玉
良出嘉興平望以副之曾國藩率楚師由甯國取道廣德進抵嘉湖爲一路策
應諸軍而令米興朝攻宜興溧陽周天受攻高淳東壩曾秉忠督長龍船入太
湖以副之攻賊之所必救據賊之所必爭俟曾國藩新募勇至然後分路進剿
庶於事有濟英法兩國合兵犯京師上幸熱河軍書旁午樞臣未全從上命擇
章京資深才優者佐諸大臣辦事毓瑛在直久諸大臣欲舉以應固辭遂越次
用焦祐瀛十一年穆宗即位諸大臣皆譴罷乃命毓瑛在軍機大臣上學習行
走邊順天府丞同治元年遷大理寺卿授軍機大臣二年擢工部侍郎調兵部

三年江南平加頭品頂戴賜花翎署兵部尙書四年擢左都御史尋授兵部尙書五年卒贈太子少保諡恭愍方端華肅順擅政毓琰獨不附及佐樞政廉慎勿懈每謂軍旅大事患在信任不專事權不一古來良將率以掣肘不能成功時以爲名言云

許乃普字演生浙江錢塘人拔貢考授七品小京官充軍機章京嘉慶二十五年成一甲二名進士授編修道光三年直南書房四年大考二等擢洗馬五年督貴州學政任滿回京仍直南書房累遷侍讀十三年復以大考二等擢侍講學士督江西學政三遷內閣學士十八年擢刑部侍郎罷直南書房專治部事調吏部又調戶部二十一年擢兵部尙書二十五年坐事鑄五級補太常寺少卿遷光祿寺卿三十年文宗御極命仍直南書房詔求言乃普疏言方今先務莫急於正君心培聖德請勅館臣合列朝聖訓依類分門排日進呈庶政奉以爲宗恩詔各省保舉孝廉方正請敕下各直省學政考覈學官學官得人所舉庶幾可恃刑部於致死胞伯叔及胞兄之案以事關服制往往夾籤聲明並非

有心干犯巧爲開脫請敕下刑部斟酌理俾無枉縱各省緣營弁兵平時宜加意訓練武職到京兵部驗看時當令兼演火器疏上得旨下所司議奏復申諭刑部及各督撫服制案罪名務得實情咸豐二年授內閣學士乃普疏論軍營奏報欺飾得旨令各路統兵大臣及各督撫力除積習嚴爲稽察其蒙混掩飾者據實嚴參摺兵部侍郎三年粵匪陷九江擾皖北覬覦北嚮而廬鳳守禦單弱乃普疏請調黑龍江兵道山東江南徑赴安徽遠可張蘇浙之聲援近可固廬鳳之門戶調刑部尋擢工部尙書調刑部國子監司業崇福奏請豫徵山西咸豐四年錢糧軍機大臣等會議推及陝西四川兩省乃普借侍郎何彤雲奏言各省情形不一應由各督撫體察情形山西被賊各州縣及陝西之延安榆林綏德興安四川之甯遠各府地瘠民貧均請免其借徵至崎零小戶有田數畝或數十畝僅足餬口仍令照常例完納庶民力不至重困又奏言時直嚴寒用兵尤宜撫卹卹出通永鎮兵四百名去賊最近而強半尙衣秋衣重以行營所在百物昂貴無錢者往往須取於民以致負販裹足兵士轉不免於饑寒請

飭統兵大臣悉心籌度從之又言江南大營老師糜餉皆由琦善等意見不和舒興阿自陝赴皖所在稽留沿途需索今命與江忠源會剿不獨難以和衷且恐因之掣肘又方今餉需艱難軍務一日未竣即度支一日不敷惟在大師刻日奏功以紓天下之困請皇上嚴加督責信賞必罰以振暮氣疏上嘉納之四年刑部主事王式言坐承審命案聽授請託失入絞罪事聞上命裕誠等按治乃普以式言本門生奏請迴避弗許既而裕誠等讞式言僕受昧上責乃普迴護降補內閣學士罷直南書房尋遷禮部侍郎擢左都御史六年遷工部尚書八年命督五城團防九年調吏部十年文宗三旬慶辰加太子太保九月以病乞罷同治五年卒諡文恪子彭壽字仁山道光二十七年進士選庶吉士授編修異遷少詹事咸豐十一年文宗崩命議郊配禮彭壽偕大理寺少卿潘祖蔭奏言臣讀大行皇帝聖製甲寅孟夏齋宮卽事詩末句以後無須再變更注云天壇配享三祖五宗爲定永不增配位恐後代無知故違則儀文太繁臣等仰瞻聖藻躬懸齋宮言法行則非博謙讓虛名弓劍未寒不忍頓生異議禮遂定

時肅順等獲罪彭壽請察治黨援旨令指實奏言侍郎成琦太僕寺卿德克津泰候補京堂富積侍郎劉岷黃宗漢得旨糾彈諸事朕早有聞特懲一儆百力挽頽靡此後不咎既往諸臣亦毋以黨援陳奏致啓許陷于是乎恩等譴黜有差彭壽又以載垣等隨事刻深戶部五字官錢案請再清釐從之同治初再遷內閣學士署禮部左侍郎五年卒

趙光字蓉舫雲南昆明人嘉慶二十五年進士選庶吉士授編修遷御史給事中轉光祿寺少卿五遷內閣學士擢兵部侍郎調戶部文宗卽位奏陳時務略言安民先察吏州縣爲親民之官秩卑責重捐例屢開仕塗益雜幕友招搖書役播弄賄屬情託靡所不至正供則那移侵虧訟案則株連擱壓偶或參劾輒籌抵制大吏慮其噬臍曲予寬容同僚相率效尤成爲習慣應請飭令督撫司道嚴行舉錯以肅官方國家糜餉養兵冀收實用近日營伍將弁虛文操演廝役士卒養尊處優空名漁利器械不修槍礮無準而水師尤爲窳敝往往居岸自適風沙水綫都未研習洋面不靖盜劫頻聞前者海疆有事船遠距而彈施

敵近前而藥罄束手無策粟體先逃凡諸軍備轉爲寇齎甚至軌律盡隳沿途坐索長官乞哀乃始進行軍威不肅一至於此夫練兵必先練將材藝遇衆忠勇無前如昔時楊遇春輩渺不可得緩急何恃應請飭令將軍督撫提鎮整齊營伍鼓勵人才以修武備詰姦除暴莫如保甲近來直隸山東盜賊日衆至河南之捻匪四川之囑匪廣東之土匪貴州之苗匪雲南之回匪肆意強橫目無法紀邪教充斥名目紛繁煽誘既衆蹂躪彌多地方文武恐滋事端惟務姑息胥差既叅賊縱容兵弁復得規徇隱幹吏嚴拘則聲息潛通奪犯戕官釀成巨患其愚懦者但期文過諱盜爲竊避重就輕以至匪徒益無忌憚禍不勝言應請飭令各直省督撫認真整頓奉行保甲緝捕動能據實獎勵疲玩者撤參重處以輯盜風直省倉庫錢糧各有定額州縣官如果儘數徵解交代清晰何至虧空盈千累萬其致此之由厥有數端或執絳而登仕版習尙奢華或庸曠而昵親隨開銷浮濫或負累已深官項償其私債或交游太廣正款供其應酬寅支卯糧東挪西掩有漕者藉口于帮丁之需索解庫者歸咎于糧價之增昂道

府察知往往碍于情面曲意彌縫後任以招重怨而不敢發上司恐興大獄而不敢參即使查抄終歸無著是以州縣交代有歷數任而未算結者有合數十州縣而未盤查者前者欽差大臣會同各督撫清查整理嚴定章程虧短各案業已分別攤賠第恐舊虧未完新虧已續應請敕令各直省督撫督同司道各官詳細查覈交代未清者停其委署升補虧那者嚴參以清積弊疏入優詔嘉納三年擢工部尙書調刑部八年命偕尙書周祖培等督五城團防事宜歷兼署工部兵部戶部吏部尙書四年卒諡文恪

朱崢字致堂雲南通海人嘉慶二十四年進士選庶吉士授檢討遷御史道光十二年畿輔災廣東副貢生潘仕成捐貲助賑賜舉人有援案以請者崢疏言仕成本副貢去舉人一間賜以舉人於破格之中仍寓量才之意厥後葉元埜黃立誠次第援請若因此遂成定例生富人微倖阻寒士進修於事不便應請旨飭各督撫水旱偏災捐輸應獎不得援引前案上嘉納之五遷至內閣學士十七年擢兵部侍郎迭兼署吏戶二部坐事鑊五秩二十六年補內閣侍讀學

土御史劉良駒條奏銀錢壅一上命各省督撫讓奏增疏言泉布之寶國專其利故定賦以粟而平貨以錢物賤由乎錢少則重重則加鑄而散之使輕物貴由乎錢多多則輕輕則作法而斂之使重一輕一重張弛在官而權操於上今出納以銀錢幾置諸無用雖國寶流通然流於下而不轉於上於是富商市僧得乘其乏操其贏而任意以爲輕重若使官爲定價且必格而不行要在因其便使人易從通其變使人不怨行其權使人不疑方今鹽務疲敝皆以銀貴錢賤爲詞以鹽賣錢而不賣銀也賣錢即解錢人必樂從長蘆鹽價可解京充餉請於東西城建庫藏錢以戶工左右侍郎掌之按時價搭放各旗就近赴庫請領以免其轉運并嚴禁尅扣短陌攙雜諸弊兩淮鹽價解備河工歲修淮上全工水路皆通輓運較易工次雇夫購料俱係用錢此兩便之道也農民以錢輸賦天下十居七八地方官收錢解銀每致賠累江西撫臣吳文鎔前奏本省坐支之項收錢放錢解部候撥之款徵銀解銀兵餉役食請照時價改折其言不爲無見惟全行收錢往返般運倍增勞費通省絕無銀幣亦未免偏枯擬請

州縣徵收向來徵銀解銀者置無論但照見在收錢者量錢糧多少視附近地方兵役衆寡酌減應解銀數以紓其困除易銀解司之外即以錢抵銀每銀一兩折錢若干酌定數目按照時價支放兵餉役食應有耗羨平餘仍行提出解司而本管同城之官俸本州縣之書工役食祭祀驛站本地方分汛之兵餉俱准坐支餘則視道路之遠近解存道府藩各庫以放兵餉時價則視省垣爲準以開徵前十日爲定由藩司通飭遵照半年一更餉銀每兩折錢多不過千七百少不過千二百取爲定則不得再減至文武官廉俸無可坐支者兵丁屯駐之區附近州縣無收錢者皆發銀如故官局錢搭放向有成例者亦如故如是則雖變而實因不至糾紛窒礙至如百姓出粟米麻絲易錢輸賦久已習爲故常向收若干今折若干凡自封投櫃者不遽改折是於民無擾也兵丁領銀仍須易錢然後適用每至兵領餉時不准舖戶抑價今照定價放給滿錢此於兵無虧也先時銀多則官以收錢漁利今時錢賤則官以易錢賠累多用錢則少解銀卽累亦因而減迨銀價平時又復可獲羨餘此於官有益也或謂錢收于

上則庫市一空恐致錢荒不知兵役領錢仍行於市地方官除存庫外尙有大半必須易銀解司則其錢亦行於市且今日之弊不在錢荒而在錢濫欲救其弊莫利於收錢尤莫利於停鑄當此錢賤之時暫停鼓鑄以工本之銀發出易錢實收上庫薄小者汰之則私鑄難行而官錢日多錢價可平而制錢一千准銀一兩之例可得而行矣是知停鑄者用錢之轉關平價者絕私之微權也將欲平價非使銀錢相埒不可爲平價而暫停鑄追價平而復開爐所謂欲贏先縮一張一弛之道也夫損上必期益下今錢值日賤物價日貴泉府費兩錢而成一錢官兵領一錢則僅當半錢無益於民有損於國孰得孰失必有能辨之者總之可用錢則用錢必須用銀則仍用銀附近則用錢致遠則用銀子母相權贏縮有制補偏救弊無踰于此惟各省情形不一因地制宜隨時變通當責各督撫體察酌議盡善疏入上命軍機大臣會同戶部議行歷通政副使內閣學士二十九年授倉場侍郎咸豐四年病乞罷五年病痊復授戶部侍郎六年擢左都御史迭署兵禮二部尙書十一年又以病乞罷同治元年卒諡文端

李函字豐垣順天寶坻人道光二年進士選庶吉士授編修再遷侍講大考二等擢侍講學士二十一年遷少詹事督安徽學政累遷通政使二十五年擢左副都御史咸豐元年署禮部侍郎應詔上疏請戒飭諸臣一曰振因循積習相仍中外一轍用兵無可退之理乃引疾歸田抽身保位則因循在軍旅矣治水爲難緩之功乃自冬徂夏漫口未合則因循在河防矣雍沙番案琦善以總督大員猶復語多狡飾以至往返鞠訊則因循在刑法矣順天武清縣逃犯竟敢窩藏匪徒浙江奉化縣刁民並敢迫脅官長則因循又在郡縣矣伏願皇上乾綱獨振力挽頹風聞嘉謨則立見施行觀弊政則悉除支蔓惰者責之勇者獎之勤者進之昏者黜之庶奮庸熙載百廢俱修矣一曰除欺飾粵西逆匪萌蘖在十數年之前使撫臣早爲奏聞何難根株立絕乃養癰成患諱莫如深比及有人指陳勢已不可撲滅年來勞師糜餉迄無成功禍首罪魁實由欺始夫獻可替否宰相之責也拾遺補闕諫官之職也伏望皇上開誠布公虛懷善納導之使言言之使盡執兩用中歸於至當至科道職司言責尤朝廷耳目之官風

聞偶誤小過可容庶曠直得效其愚妻菲莫行其罔而宸聰四達矣一日屏偏
私人之氣質不能無偏意見少有參差議論遂多齟齬相持不下教令紛更屬
員既無所適從宵小遂從而譏構嫌隙日深乖氣致戾刑部越獄一事非其明
驗乎夫師克在和不在衆兩粵會勦湖南防堵將帥不應有諉罪爭功之見督
撫不可存此疆爾界之私同德同心羣策羣力苟無隙之可乘定膚功之克奏
河漕本屬一體未有河不治而漕治者從前督臣漕臣曾因參劾廳員各執己
見見在漫口不能合龍漕船何由利濟億萬姓饑民待賑數百萬帑項虛糜正
大臣憂患與共之時此卽屏除嫌怨共秉公忠猶恐難以濟時屯而紓民患倘
仍芥蒂未化籌畫分歧不和政胤咎將誰執伏讀仁宗御製和同論諄諄以臣
下偏私爲戒願皇上一德交孚與百僚共襄上理焉一日防玩法見今軍務河
工貽誤諸臣厥咎匪細仰蒙寬典僅予薄懲恕其既往之愆責其將來之報而
且失伍之將弁准其帶罪立功潰防之河員許其留工効力恢宏大度格外矜
全天下皆曉然於聖人不得已之苦心與夫通變權宜之計該大臣等久蒙倚

任渥荷優容自無不激厲圖功竭忠矢志第恐奔走禦侮難得賢員倅澤恃恩復萌故智始猶懼罪之不可追一旦獲宥遂謂罪有可原矣初猶慮法之不能逃幸而苟免遂謂法止于是矣伏願皇上奮天錫之勇播神武之風寬大之詔能發而即能收希冀之恩可一而不可再則德威惟畏玩縱之萌不戢自止矣以上四條皆臣道之防實切時之弊而其本由於得人進其銳則因循者退矣取誠篤則欺飾者鮮矣惟在皇上任賢勿疑用材器使俾朝無倖位莫不圖易思艱庶可挽天災民變之窮而上副引咎納言之至意疏入上嘉納之三年授兵部侍郎署倉場侍郎廉得奸人把持倉務實於法十年調工部復調吏部同治元年擢工部尚書二年卒諡文恪

張祥河字詩舲江蘇婁縣人嘉慶二十五年進士授內閣中書充軍機章京遷戶部主事累轉郎中十一年出爲山東督糧道十七年擢河南按察使以父憂去官服除仍授河南按察使署布政使二十二年祥符決口合龍賜花翎詔以河南迭被水災始終克勤其事予優叙二十四年遷廣西布政使擢陝西巡撫

西安同州有刀匪擾害閭閻祥河飭嚴捕百餘人置諸法詔嘉之三十年文宗即位應詔陳言誌述祖德守成法勸官方蠲民欠疏入報聞祥河優於文事治尙安靜不擾民言者劾其性耽詩酒咸豐二年東南軍事日棘祥河奏言陝西興安等地毗連楚境應舉行團練擇要防堵惟鄉勇良莠不齊易聚難散不如力行保甲爲緝奸良法三年召還京四年授內閣學士尋遷吏部侍郎督順天學政六年以病罷病痊仍授吏部侍郎八年擢左都御史遷工部尙書十年加太子太保十一年以病乞罷同治元年卒諡溫和

羅惇衍字椒生廣東順德人道光十五年進士選庶吉士授編修十七年督四川學政召對上以惇衍年少語多土音留不遣二十三年大考一等擢侍講累遷侍讀學士轉通政副使太僕寺卿二十六年督安徽學政遷通政使三十年文宗即位應詔陳言略言古帝王治天下根源祇在一心要在覽載籍勸省察居敬窮理以檢攝此心聖祖仁皇帝御纂性理精義於存養省察致知力行以及人倫性命皆有程途階級其論君道尤極詳備惟在皇上講習討論身體力

行世宗憲皇帝硃批諭旨於臣工奏摺指示得失明見萬里皇上幾暇日閱一二事凡督撫陳奏如能深謀遠慮措置得宜即予以褒答若有飾詐懷私亦爲之指示庶大吏皆知警戒他若御纂資政要覽庭訓格言諸書皆本心出治一以貫之伏願皇上法祖以修己推而知人安民皆得其道又請諭部院大臣各舉所知備京卿及講讀之任敕直省督撫提鎮學政皆得犯顏直諫指陳利病無所忌諱藩臬亦許密封由督撫代爲呈奏疏入上嘉納之咸豐元年疏陳風俗侈靡民生日困請崇儉禁奢以畜物力二年署吏部侍郎授左副都御史三年擢刑部侍郎仍兼權吏部時軍需孔亟戶部令京師商民以賃舍金一月納公家俸衍以爲非政體疏乞明定限制又疏荐廣東在籍給事中蘇廷魁等任籌軍餉江甯既陷寇氛復溯江上犯惇衍疏請勅曾國藩練楚勇自湖南移駐武昌杜賊窺伺荆襄蘇廷魁募粵勇援江西袁甲三回河南防捻匪並會同已革兩廣總督徐廣縉募新兵堵禦鳳穎遏賊北竄諸路多被採納命隨同惠親王巡防京師調戶部五年以父憂歸七年英吉利兵攻陷廣州八年正月命惇

衍及在籍太常寺卿龍元僖給事中蘇廷魁爲團練大臣十年款議定十一年
召來京擢左都御史同治元年兩廣總督勞崇光被劾任用非人調度乖方命
惇衍偕廣州將軍穆克德訥按治崇光坐罷邊戶部尙書疏言吏治日壞當獎
廉懲貪四川總督駱秉章湖北巡撫嚴樹森山西布政使鄭敦謹山東按察使
吳廷棟清操較著請獎之以勵其餘又疏言皇上求賢若渴應詔者寥寥即有
登諸薦牘者或由他省督撫保舉必待本省給咨始能赴部非所以示虛懷延
攬之道且但令封疆大吏保舉而未及京卿恐馴致外重內輕不可不防其漸
內閣六部九卿等朝廷重臣素所親信必俾其各舉所知衆正盈廷然後可反
危爲安轉亂爲治請不必限以時日拘以人數但有操守廉潔才猷卓越者即
許隨時疏薦倘所舉之人將來或犯貪污罪其舉主二年兼署左都御史四年
兼管三庫署翰林院掌院學士伊犁參贊大臣聯捷御史陳廷經先後論劾陝
西布政使林壽圖沉湎於酒巡撫劉蓉未諳公事舉劾悉聽壽圖及蓉疏奏失
體漏洩密保命偕協辦大學士瑞常赴陝西按治惇衍等爲疏辨僅以微過議

處吏議壽圖遷調蓉革職留任尋蓉復以他事罷陝民爲蓉壽圖訟冤總督楊岳斌以聞惇衍等已回京復命覆奏遂合疏言劉蓉秉性樸直辦理甘肅潰勇不動聲色悉臻妥善甘肅亂回竄擾遣兵分布要隘陝民以安林壽圖身任勞怨勤奮有爲惟參劾屬員間有輕重失當致誘毀紛興而其廉潔之操究不能稍加嘗議詔蓉仍署巡撫壽圖來京候簡用六年兼署工部八年以母憂歸十三年卒諡文恪惇衍學宗宋儒立朝正色抗論時事章凡數十上無所顧避著有集義編百法百戒庸言孔子集語等書

鄭敦謹字小山湖南長沙人道光十五年進士選庶吉士散館授刑部主事再遷郎中出爲山東登州知府擢河南南汝光道咸豐元年泌陽土匪喬建德踞角子山敦謹與南陽鎮總兵圖塔布督兵捕獲之被議叙署布政使二年授廣東布政使仍留署任粵匪入湖北命赴信陽會南陽鎮總兵柏山扼要設防三年命河南巡撫陸應穀統兵駐南陽會城及信陽有事許敦謹專摺馳奏欽差大臣琦善督師授安徽檄敦謹總理信陽糧臺及師屯江北糧臺移設徐州仍

令敦謹往任其事尋調授河南布政使留堯楹臺如故四年光州陳州擒匪起
巡撫英桂出駐汝陽詔敦謹赴本任省城戒嚴敦謹督率官紳倡捐經費興團
練皖捻犯永城夏邑增調兵勇防黃河各渡口斷寇北竄尋命暫署巡撫五年
坐欠解甘肅兩年協餉降調召還京以四品京堂候補授太常寺少卿八年督
山東學政累遷大理寺卿同治元年署戶部侍郎復出爲山西布政使調署陝
西布政使調授直隸布政使擢河東河道總督四年授湖北巡撫尋召授戶部
侍郎五年調刑部六年擢左都御史擒匪渡河入山西境巡撫趙長齡按察使
陳澍疏防被劾詔敦謹往按長齡澍並坐罷即命敦謹署山西巡撫七年出省
治防移軍駐澤州欄車鎮爲各路策應授工部尚書仍留署巡撫回匪入河套
近邊震動敦謹移駐甯武督防別遣兵守榆林保德下游各隘增募礮勇補葺
河曲邊牆回匪窺包頭鎮沿河堵禦會綏遠將軍定安遣隊迎勦總兵張曜自
河曲截擊破走之八年調兵部尚書回京九年調刑部兩江總督馬新貽被刺
獲凶犯張汶祥江甯將軍魁玉漕運總督張之萬會讞言汶祥爲洪秀全餘黨

其戕新貽別無主謀者命敦謹往會鞠仍以初讞上論極刑十年春敦謹還京至清江浦上疏以病乞罷光緒十一年卒設恪慎

龐鍾璐字寶生江蘇常熟人道光二十七年一甲三名進士授編修咸豐二年大考一等擢庶子遷侍講學士署祭酒明年授光祿寺卿八年擢內閣學士署工部侍郎以父憂歸十年江南大營潰蘇常淪陷督團勇防禦上命鍾璐陳奏軍事鍾璐疏言常昭三面皆賊惟恃民團抵禦器械不精紀律不明若大兵不速至恐裹脅愈多愈難措手請飭督臣曾國藩迅由祁門統師南下常昭庫欵無存惟賴捐輸充餉軍需浩穰捐戶摻括無遺並請飭督臣於就近完善之區籌資接濟又奏江北惟通州最完善與常昭有唇齒之依在籍布政使徐宗幹廉能素著請飭令督辦通泰一路捐輸並會籌常昭防勦從之尋命督辦江南團練賊由江陰東竄偏常熟鍾璐率團勇數戰亡其精銳奏請江北諸軍速援上以水陸各軍勢難兼顧溫詔慰勉八月賊陷常熟鍾璐奏自劾並請飭荊州將軍都興阿統楚師兼程進駐通州防北竄上責令規復鍾璐自崇明赴上海

設局勸捐集團守禦薦上海知縣劉郇膏循聲卓著爲江蘇州縣之冠報聞又以軍需餉急奏請令失守地方官酌緩免治罪諭有捐輸巨款募勇殺賊隨官兵克復城池者得據實聲明請旨尋奏言賊所脅之衆數百萬人何一非皇上赤子若非設法解散窮無所歸必鋌而走險請明降諭旨予以自新釋兵歸降者勿殺雜髮投順者勿殺又陷賊州縣多設立偽官迫索錢米以減輕田賦搖動人心慙來被兵州縣錢糧均奉恩旨蠲免此次蘇省被賊戶口散亡收復之後無從徵收不如施恩於未復之先使愚民不爲所惑詔如所請十一年春賊自平湖乍浦窺金山鍾璐督團勇進擊斬馘甚衆新埭賊擾大泖港楓涇賊窺角鈎彎復會官兵破之是年冬以蘇常淪陷吳民待援有逾飢渴復疏請勅曾國藩分兵急取蘇常與江蘇諸士紳貽書國藩言上海餉源重地請以奇兵萬人一勇將統之倍道而來可當十萬之用國藩乃遣李鴻章率師浮江而東俄法兩國請助兵討寇鍾璐奏言中國平內亂原無待藉手外人而值賊勢蔓延兵力單薄不能不爲從權之計惟外人助攻爲通商而起必先自有把握方裨

大局諭江蘇巡撫薛煥妥籌酌行尋裁各省團練大臣召還京再授內閣學士
同治元年遷禮部侍郎迭署工吏諸部督順天學政四年呈所纂文廟祀典考
六年夏畿輔亢旱疏陳荒政十事下部議行命偕大學士賈楨等督五城團防
歷戶兵吏諸部九年擢左都御史署工部尙書十年授刑部尙書丁母憂歸光
緒二年卒設文恪子鴻文光緒二年進士鴻書光緒六年進士同官翰林院編
修鴻文至通政司副使鴻書至貴州巡撫

論曰同治初政沈兆霖曹毓瑛入贊樞府兆霖暫領陝督督師定西甯以死勤
事毓瑛慎密練達克副簡拔許乃普等皆以清謹負時望鄭敦謹尤敗歷有名
績江甯之獄論者多謂未盡得其情敦謹未覆命遽解官以去其亦有所未慊
於衷歟

清史稿

列傳二百九

王茂蔭

宋晉

袁希祖

文瑞

徐繼畲

王發桂

廉兆綸

雷以誠

陶樑

吳存義

殷兆鏞

王茂蔭字椿年安徽歙縣人道光十二年進士授戶部主事升員外郎咸豐元年遷御史疏請振獎人才鄉會事務覈實殿試朝考重文義造就宗室八旗人才以有裨實用爲貴戶部議開捐納舉人生員例茂蔭疏爭且言籌餉之法不徒在開源而在於善用委諸盜賊之手靡諸老弱之兵銷諸不肖之員弁雖日言推廣捐輸何濟又極論銀票虧商銀號虧國經國謀猷下同商賈體至義而利實至微初時虧不能見及虧折已甚雖重治其罪亦復奚補其言皆驗二年

粵匪自長沙趨岳州茂蔭疏言安徽防務以宿松爲要衝小孤山爲鎖鑰設險非難得人爲難請起前署廣西巡撫周天爵幫辦防堵扼要駐守陸路令府縣勸諭紳民團練守助用明金聲禦流賊保鄉里之法最爲簡易武昌既陷茂蔭又疏言賊勢猖獗宜急收人心籌儲積講訓練求人才三年戶部奏試行鈔法上命左都御史花沙納與茂蔭會議奏行簡要章程並繪鈔式以進疏言皖北蒙亳捻匪蠶起萬一粵賊勾結更爲心腹巨患夫欲平盜賊尤在守令得人盧鳳穎諸郡守令貪鄙者實繁有徒請嚴飭大吏從嚴劾汰以治賊之源又曰兩湖江皖處處言防而處處不守請嚴飭各督撫專主勦辦一處賊平則他處之賊不敢復起鄰省賊滅則本省之賊無自而來是不言防而防自固也三月揚州陷茂蔭疏言寇氛將逼山東巡撫以勦賊出省藩臬漫無布置城內團丁不滿七百乞特簡重臣防守以固畿南屏蔽又言陝西設防兵爲民害請諭飭按治茂蔭屢上疏言事侃侃文宗頗嚮用擢太常寺卿邊太僕寺卿粵匪犯畿輔參贊大臣科爾沁親王僧格林沁駐師涿州諸軍咸觀望不肯前茂蔭疏言賊

既渡滹沱而北迺翔於深晉之郊而不遽北犯者懼吾兵出而遷延不進賊有以知我之勇怯矣臣竊謂賊自桂林北竄諸帥喪師左次皆爲一守字所誤賊屯一日可資休息我屯一日銳氣日隳賊所過劫掠行不裹糧我軍坐食縣官日需鉅餉相持數月餉絕兵值不待交綏而勝負已判請密飭王大臣等明發號令按兵拒守而陰選健將率死士數千潛師出彼不意麾兵急擊一鼓可殲如此則大河以南諸賊心怵膽落不敢復圖北犯矣尋命會辦京城團防保甲擢戶部侍郎兼管錢法堂戶部奏鑄當十當五十大錢王大臣又請增鑄當百當千謂之四項大錢當千者以二兩爲率餘遞減茂蔭上疏爭之曰大錢之鑄意在節省由漢訖明行之屢矣不久即廢未能有經久者今行大錢頗見便利蓋喜新厭故人情一概及不旋踵棄如敝屣稽諸往事莫非如定錢法過繁市肆必擾折當過重廢能必速此人事物理之自然論者謂國家此制當十則十當千則千孰敢有違不知官能定錢直而不能定物直錢當千民不敢以爲百物直百民不難以爲千自來大錢之廢多由私鑄繁興物價騰踊未

沈疇之言曰當十錢鑄召禍導奸游手之徒爭先私鑄無故而有數倍之息雖日斬之勢不可遏張方平之議曰奸人盜鑄大錢之用日輕比年以來虛高物估增直於下取償於上有折當之虛名罹虧損之實害大觀錢鑄自蔡京而其子條作國史補叙始之得息流通繼之盜鑄多弊終之改當折閱事皆目睹尤爲詳盡古所不能行而謂可通行於今乎信者國之寶大錢鈔票皆屬權宜之計全在持之以信庶可冀數年之利今大錢輕重程式甫經頒行未及數月忽盡更變商民惶恐羣疑朝廷爲不可信此非細故也或慮銅短停鑄故須及時變通順變通欲其能行不行則亦與不鑄等逆賊一平不忠無銅若賊不能平銅不能運雖儘見有之銅悉鑄當千恐亦無濟可慮者不僅停鑄而已上命王大臣及戶部秉公定議王大臣終執原議四年戶部會奏推廣大錢辦法茂蔭復疏爭曰臣疏陳大錢利弊未奉諭旨臣職司錢法夙夜思維實覺難行當百以上大錢與原行當五十者無甚分別此何以貴彼何以賤難一以易市物則難分折以易制錢莫與兌換難二大錢雖準交官項然準交五成者已有寶鈔

官票大錢何能並搭難三此猶其小者耳最大之患莫如私鑄奸人以銅四兩鑄大錢兩枚即抵交官銀一兩是病國也蓋行制錢每千重百二十兩鎔之可得六十兩以鑄當十錢可得三千設奸人日銷制錢以鑄大錢民間將無制錢可用是病民也實鈔官票其省遠過大錢果能推行盡利裨益亦非淺鈔大錢之行似可已也疏入仍不報其後大錢終廢如茂蔭言又疏論鈔法利病略曰上年初用銀鈔雖未暢行亦未滋累及臘月行錢鈔至今已發百數十萬爲累頗多向來鈔法唐宋之飛錢交子會子皆有實以運之元廢銀錢不用而專用鈔上下通行爲能以虛運實明專以虛責民以實歸上勢遂不行臣元年所奏皆以實運虛之法今時勢所迫前法不行議者雖專於收鈔時設法然京師放多收少軍營有放無收直省州縣有收無放非有商人運於其間則皆不行非與商人以可運之方能運之利亦仍不能行因擬上四事務在通商情利轉運奏入上斥其爲商人指使不關心於國是命恭親王奕訢定郡王載銓覈議議上謂茂蔭所論窒礙難行嚴旨切責尋調兵部學匪踞池州太平皖南隔絕

茂蔭奏請以徽州暫歸浙江統轄上命浙江巡撫黃宗漢體察酌行初茂蔭疏言賊脅良民驅爲前鋒請特降諭旨自拔來歸均從寬貸殺賊來獻均加爵賞京師久不雨上命清鑿庶獄減免情節可矜者茂蔭又疏言可矜者莫如賊中逃出之難民各處捕獲難民指爲形迹可疑嚴訊楚毒此輩於法不爲無罪於情實有可矜請敕暫緩定擬皇上御極以來屢詔求言言或無當奉旨明斥斥其無當非禁使不言也然言者即因以見少即如諸路慎軍失地之將帥未敗之始其措置乖方人言藉藉而無敢爲皇上言者或慮無實據也或雖有實據而慮查辦時化爲子虛也或慮不用而徒招怨也或謂聖心自有權衡也是以皆不敢言至用人進退之際臣子每不敢盡言淺者懼干聖怒而見斥深者懼激上意而難回皇上披覽奏章纖悉必邀批示勤亦至矣臣以爲精神貴於不紛願務其遠者大者舍其近者小者明主勞於求賢而逸於任人今天下人才不足此誠可憂雖然非無才也如羅澤南人無不知爲將材矣初不過一貢生耳湖南一省既有江忠源兄弟又有羅澤南諸人則他省可知惟賢知賢惟才

愛才是在聖心之誠求耳方今武昌未下江西又復危急兩省之民向也與賊爲仇今乃竟有從逆者此中轉移之故宜深思也列聖仁漸德被人心斷不能忘然此時不亟維繫使賊得徐出假仁假義以爲市恐民心將爲所搖而難挽矣奏入上嘉納之八年病免十一年穆宗即位以茂蔭忠直命俟病痊聽候簡用同治元年上半年疏陳時政言天象示警宜屢修省議政王責任重大宜專心機務餘事綜其大綱言官宜加優容順天府事繁府尹石贊清不宜兼部各國通商事務衙門司員甫及一年即得優保恐各衙門人員皆以營求保送爲得計宜防其漸著左副都御史命偕兵部尙書愛仁往山西按事授工部侍郎二年調吏部丁繼母憂歸四年卒於家

宋晉字錫蕃江蘇溧陽人道光二十四年進士選庶吉士授編修二十七年大考二等擢中允二十九年典河南鄉試因命題錯誤議處諭不得更與考試差咸豐二年大考二等擢侍讀學士遷光祿寺卿三年命會辦京城團防保甲署禮部侍郎四年正月疏言去冬團丘大祭適值聖體違和禮臣以登降繁縟於

親詣壇位及奠帛後諸儀節更加酌定奏請允行旋以遺親王恭代而止惟詳稽典禮祀天鉅典尤爲慎重偶遇服色不宜輿居未適有遺代無議減見值祈年大祀伏願皇上飭停新議仍遵成憲五年遷宗人府丞六年疏言自江甯失陷上自九江下及鎮江瓜洲寇勢水陸相援見聞向榮兵力不支情形危急今即分路赴援仍恐緩不濟事請飭江督浙撫雇用輪船載兵由閩山關入江焚攻金焦賊船再由儀徵溯浦口與六合諸軍相爲犄角則江甯鎮江對岸之賊節節防我必不敢離巢東竄是不特解江南之急即江北亦愈甯謐又聞廣東新至紅單船二十餘艘請飭德興阿向榮將紅單船并歸一處力扼蕪湖江面如能克復蕪湖則拊賊之背甯國不攻自下薦道員繆梓楊裕深金安清通達治體洞悉夷情請以履船籌費諸事責成辦理疏上諭兩江總督怡良與向榮德興阿酌行宣宗實錄告成叙勞擢內閣學士迭署戶工二部侍郎八年授工部侍郎文宗頽歲抱病未能親行祀典十年晉疏言近年郊壇大祀聖躬以步履失常偶緩親行而於遺恭代外仍先期躬詣皇乾殿拈香仰見寅畏深衷惟

每屆大祀皇上於前一日辰巳間躬詣拈香即在齋宮祇宿今則先期即如臨事請於前一日寅卯間先行詣殿拈香然後還宮辦事臣尤願慎攝聖躬養元氣節岐代之味復健行之常於下屆郊祀大典照常親行上嘉納之十一年疏言江甯失陷已將十載總督曾國藩經營防剿與官文胡林翼會合攻復安慶惟所部不足二萬人若合四川湖北湖南江西安徽五省歲入養兵勇十三萬人以七萬分駐防剿六萬大舉東征餉足兵增庶可一舉集事又言江西首當賊衝巡撫毓科布政使慶善皆失人望請以太常寺卿左宗棠簡署巡撫而於督糧道李桓前廣饒道沈葆楨浙江道員史致諤三人中簡擇擢授藩司又請以曾國藩總統四川湖北湖南江西安徽五省督辦東征軍務上以所籌不爲無見下官文國藩等議奏又疏言慕陵規制儉約樸實萬世可法定陵工程請仿行勿改格於部議不行同治元年調倉塲侍郎南漕初改海運歲額三百萬石自天津運京倉偷漏飛灑歲損米糞鉅道軍興江浙郡邑淪陷南漕起運纔二十餘萬石而偷漏飛灑如故十年以來侍郎及監督官凡數易皆受事深悉

其弊因循未奏舉六年事發左遷內閣學士償米二萬石十二年遷戶部侍郎十三年卒

袁希祖字笱陔湖北漢陽人原籍浙江上虞道光二十七年進士選庶吉士授編修咸豐二年大考二等擢侍講三遷侍講學士八年超擢內閣學士迭署禮工刑諸部侍郎九年疏言咸豐初以道梗銅少改鑄大錢未幾當百當五皆不行惟當十行之始直制錢三五近則以十當一銀直增貴百物騰踊民間重困旗餉月三兩改折錢十五千致無以自活向日制錢重一錢二分大錢重四錢八分以之當十贏五錢四分今以十當一是反以四錢八分銅作一錢二分用也民間私鑄改鑄百弊叢生今天下皆用制錢獨京師一隅用大錢事不盡一請悉復舊規俾小民易於得食盜源亦以稍弭十年疏言軍事略謂數年以來地方軍事所謂失守無所爲守也但聽其失即坐以罪僅革職留營而已所謂收復不見其收自然而復俟賊自去即虛報克捷上狀列保以樹植私人似此用兵安有成功之一日臣愚以爲今雖收裂機尙可轉賊窺蘇常久一旦得之

子女玉帛其意已鑿不特金陵老賊全股爭趨即天長六合之賊亦涎其利宜乘彼勢方散緩請特選重臣駐清淮要地統籌全局頃諭旨令曾國藩赴兩江署任規復蘇常自甯國進兵前後受敵非萬全之計莫如令胡林翼自江北進攻牽制安慶令楊載福以水師直下大江互相策應令李若珠力攻天長六合以出江浦遙立聲援密飭國藩潛引銳兵倍道以取金陵方爲上策今日勞師糜餉勢無窮已兼各路統帥散而無紀其賢者往往深入援絕血戰隕身其不肖者坐擁厚兵遇敵輒避必得重臣領兵統馭積弊既除精神乃奮此轉移之機也尋署戶部侍郎時各直省行團練分遣大臣督辦希祖疏言團者一時可集練非經久不能即云團練非五六千人不可計口授食費已不貲即使練成而此五六千人制敵不足騷動有餘坐食貲黷終虞譁潰且邊往大臣萬一與有司齟齬必至互爲水火轉貽大局之憂請頒明諭使知團練乃以自衛鄉間並不以此科歛亦不必日給口糧坐守困耗否則用多費溢正供無可挹注不得不取諸民輕則聚衆重則返戈大可慮也英法俄美四國合軍內犯天津不

守希祖請暫就和議遷延旬日俾部署得以周詳僧格林沁獲英官巴夏里希祖疏請殺之未幾敵軍深入上巡幸熱河希祖屢疏諫不報屢北望痛哭遂得疾已而和議成兼署兵部侍郎尋卒

文瑞字叔安烏蘇氏滿洲鎮紅旗人道光二十一年進士選庶吉士授編修擢侍講五遷至左副都御史文宗即位求言文瑞疏陳四事請選賢才明賞罰廣聽納謹調攝並錄乾隆元年左都御史孫家淦三習一弊疏以進上嘉之咸豐三年粵匪陷武昌東下疏請於上海鎮江履川廣東紅單船擇員統帶以防江面並密察京師流言以消逆萌靖畿輔上命諸大臣集議增兵籌餉文瑞疏言兵餉爲國家大政遵旨會議乃大學士等絕無一語及公言笑晏晏不知內閣何地不詢會議何事臣臆舉摺持之策尙書孫瑞珍竟閑辭支吾自述家私形同市井大臣如此深堪悼嘆又言二月朔爲領俸定期戶部欸絀早應籌畫乃於是日清晨請旨冀以停俸上諉朝廷又議行鈔法並徵鋪稅商民驚懼請發帑三十萬支放春俸暫可流通俾商民安業鈔法鋪稅暫從緩議從之又疏言

鈔法之弊放多收少半爲廢紙放少收多民間鈔無從得若收放必均是與之甲而取之乙徒擾無益非易銀鈔爲錢票不可擬就道光年間所設官號錢鋪五處分儲戶工兩局卹錢京師俸餉照公費發票之案按數支給以錢代銀並具條目六事疏入議行尋兼署大理寺卿以天變奏請修省上嘉納之刑部罪人劉秋貴死於獄文瑞奏秋貴無病一夕而死刑部後四日入奏改易日期塗飾操縱請嚴飭根究山西崞縣民婦王劉氏拒姦死罪人從輕比刑部題駁文瑞復奏原擬知州失出請飭山西巡撫嚴劾上並從之粵匪入山西境陷平陽等處文瑞奏請飭督兵大臣嚴防入直隸要路尋自臨洛關竄過天津命文瑞率兵駐通州奏言通州城垣樓櫓損壞請集款建復諭此守土之責統兵大臣不必兼轄擢刑部右侍郎四年以病乞罷先是文瑞借克勤郡王慶惠請捐銅鑄四項大錢濟兵饑上從其請及還京病痊命仍與惠慶董其事設局開爐上命尙書阿靈阿御史范承典往銅廠查驗文瑞奏劾阿靈阿等擅開爐房恐有偷漏上斥其負氣任性降二級調用同治元年卒統祿字曉山舒穆魯氏滿洲

正白旗人道光二十一年進士授刑部主事累升郎中遷御史軍興安徽江蘇山東諸省皆暫停秋審毓祿奏言竄蹤所至每先釋獄囚脫其死而置之生白必願爲賊用雖有投首減罪之例而愚頑類多不知大義聞直隸近因賊擾將秋審諸囚酌覈情罪其謀故凶盜拒捕殺人重囚立即正法其情有可矜及例應緩決諸囚即予減等發配誠爲權宜變通之道見有軍務省分應令一體遵辦京師行用大錢當百當五十二種壅滯不行毓祿疏請商民應納旗租地丁關稅於例定收鈔五成數內專收當百當五十大錢二成部收捐項應交錢票亦一律納大錢七年擢工科給事中歷內閣侍讀學士太僕寺少卿通政司副使內閣學士同治三年擢工侍郎兼管錢法堂五年奏言寶源局鑄當十錢向係滇省解銅以銅七鉛三配鑄近因滇銅久未解局市銅低雜致錢文輕小例定每錢應重三錢二分請每屆收錢以三錢爲率不及者即飭改鑄上斥寶泉寶源二局不職之兩侍郎監督並下吏議

徐繼畬字松龕山西五臺人道光六年進士選庶吉士授編修遷御史迭疏劾

忻州知州史夢蛟保德知州林樹雲營求升遷登州知府英文諱災催徵榮河知縣武履中藉事科歛又疏請除大臣迴護調停積習又疏陳政體宜崇簡要略謂皇上廣開言路諸臣條奏苟有可取無不通行訓諭惟是積習疲玩已久煌煌聖諭漠不經意輕褻甚矣臣以爲諸臣條奏或非大體所關或非時務所急原不必悉見明文若事關切要聖慮折中期於必行者即降諭旨宜重考成度其事之難易限年興革如仍前玩視於本案外重治以違旨之罪此教令之宜簡也六部則例日增律不足求之例例不足求之案陳陳相因勢亂如絲論者謂六部之權全歸書吏非書吏之有權條例之煩多使然也臣以爲當就現行事例精審詳定取切於事理者事省十之五文省十之七名曰簡明事例使當事各官得以知其梗概庶不至聽命於書吏此則例之宜簡也考功職方議功議過使百僚知勸懲也現行之條苦於太繁太密不得大體嘗見各直省州縣有莅任不及一年而罰俸至數年十數年者左牽右掣動輒得咨且議處愈增愈密規避亦愈出愈奇彼此相遁上下相詭非所以清治道也臣以爲各官

處分凡關於國計民生官箴品行不妨從重從嚴其事涉細微無關治禮與夫苛責太深情勢所難者當準情酌理大加刪削此處分之宜簡也疏入上嘉納旋召入對論時事至爲流涕十六年出爲廣西潯州知府擢福建延邵道調署汀漳龍道海疆事起敵艦聚廈門與漳州隔一水居民日數驚繼畬處以鎮定民賴以安二十二年遷兩廣鹽運使旬日擢廣東按察使二十三年遷福建布政使二十六年授廣西巡撫未赴官調福建閩浙總督劉訥珂以病乞假繼畬暫兼署總督福州初通商英吉利人僦居會城烏石山神光寺士民大譁言路以入告上命訥珂繼畬令其遷徙久之乃移居道山觀士民以繼畬初不力拒終不慊言者屢論劾繼畬初入覲宣宗訓各國風土形勢奏對甚悉退遂編次爲書曰瀛寰志略未進呈而宣宗崩言者抨擊及之咸豐元年文宗召繼畬還京召對稱其樸實尋授太僕寺少卿詔求言繼畬上疏略謂國家崇尚儉樸大內宮殿一仍明舊惟圓明園爲三時聽政之地避暑山莊爲秋獮駐蹕之地兩處規模至乾隆間而備宣宗皇帝暫停秋獮熱河工程一切報罷惟自正月至

十月恒駐圓明園然三十年中未嘗增一堵一椽游觀不及諸坐落或報應修輒令撤去以故內帑發出外庫前後凡千數百萬數年以來園亭久曠或謂先朝堂構不應坐聽彫殘方今軍務未完河工未畢亦料無暇及此將來兩事告歲內庫稍充保無以管轄之說嘗試者伏望皇上堅持苟非萬不得已之工程一切停能至於裝修陳設珍奇玩好可省則省無取鋪張此土木之漸宜防也孔子刪詩以關雎爲首義取摯而有別匡衡之說有曰情欲之感無介於容儀宴安之私不形於動靜其言有別可謂深切著明第以事涉宮闈絕於聽視非臣子之所敢言雖有折檻之忠牽裾之直止能言得失於殿廷豈能爭是非於宮壺故聖帝明王卽以是爲修省最切之地皇上至剛無慾邇者釋服禮成將備周官九御之制衍大雅百男之祥竊以爲聖德日新肇基於此此晏安之漸宜防也自古壅蔽之患由於言路不通然亦有言路既通而壅蔽轉生於不覺者皇上御極之初卽以開言路爲務自倭仁一疏手詔褒嘉言事者紛紛而起邇因天旱求言又復諄諄獎誘舉空言塞責受人指揮激直沽名三弊爲戒臣

庶大半中材臣以爲空言塞責事出庸憊一覽擲之無關輕重激直沽名由於器小皇上予以優容適足以見聖度至受人指揮事涉營私果其確有可懲必當明正其罪總之羣言淆亂衷諸聖人亦在皇上權衡酌量而已臣竊計在京言事者約分三等以章奏陳者曰九卿科道以章奏陳兼得面陳者曰部院大臣不以章奏陳而時得面陳者曰內廷王公此三者各有所優亦各有所蔽九卿科道爵秩未崇少迴翔之意聞見較廣多探訪之途以風節相磨以彈劾爲職此其所優也其所蔽則前之三弊是也部院大臣久在朝列受恩効忠明習時事此其所優也然階級旣崇天顏日接顧忌矜慎胸臆所存莫能傾吐其十一此則其所蔽也內廷王公國家肺腑外無私交黨援之患內無希倖府賞之心此其所優也然法制綦嚴例不與外人交接廷評輿論所不盡聞此則其所蔽也皇上明目達聰幽隱畢照而臣乃鯁鯁過慮者誠恐言事者限於才識未能仰副淵衷致皇上察納虛懷不免悵然而思返此壅蔽之漸宜防也昔唐臣魏徵有十漸之疏太宗嘉納千古以爲美談夫漸者已然之詞也正之於已然

何如防之於未然臣謹師其意衍爲三防之說極知迂陋無補高深伏冀幾餘採納上優詔報之咸豐二年吏部追諭繼畬在巡撫任遽送罪人遲誤請議處乃罷歸尋丁母憂粵匪北犯攻懷慶山西巡撫哈芬檄太原總兵烏勒欣泰率兵防澤州遷延未即赴賊渡河陷垣曲哈芬出駐陽城布政使郭夢齡疏乞援繼畬亦具疏借布政使印馳奏上爲罷哈芬巡撫以王慶雲代之繼畬條舉防守諸事以告尋奏請令繼畬督辦防堵事定居數年回捻交亂又命督率官紳總辦各府州團防繼畬駐路安年餘親歷遼州上黨陽城諸要隘措置詳備嘗巡撫沈桂芬甚重之同治二年召詣京師命在總理各國事務衙門行走尋授太僕寺卿加二品頂戴五年以老疾乞歸繼畬父潤第治陸王之學繼畬承其教務博覽通時事在閩粵久熟外情務持重以恩信約束在官廉謹罷歸主平遙書院以自給尋卒

王發桂字笑山直隸清苑人道光十六年進士授禮部主事充軍機章京累遷郎中咸豐三年上疏言軍事被嘉納尋遷御史洪秀全既踞江南分兵北犯發

桂疏言順德正定地當衝要請屯兵扼隘並條列六事曰謹偵報嚴催價慎查勘明曉諭廣撫卹籌協濟又疏薦貴州道員胡林翼知兵能勝重任請超擢俾任軍旅上命林翼留湖北襄軍事迭疏請令各省汰舊伍練新兵設鄉團值有事則新軍進戰鄉團設防以明戚繼光紀效新書練兵實紀訓練將士賊渡河偏近畿輔疏請蒐簡軍實選精銳爲後備並蠲貧民房稅撫流亡以安人心下所司議行疏言軍興以來大臣獲罪多以從軍自效位崇性驕不可任使坐耗糧精無裨軍政且主將曲庇輒請起用有罪幾同無罪圖功適以冒功頃副都統達洪阿退縮失律致知縣謝子澄副都統佟鑑同時死寇欽差大臣勝保賜以神雀刀原令便宜行事乃自入直境未戮一人而於獲戾大臣多所論薦以私廢公抑阻士氣請按治達洪阿以下行軍法紀律既嚴軍威自振並被採納累遷給事中鴻臚寺卿八年復疏論時事言宜上廉恥重訓練以求將帥之才李續賓唐訓方起自末僚能自張一軍轉戰千里敦樸廉潔勇往任事之人隨地而有請飭督撫採訪奏聞物力艱窘莫甚於湖南軍餉糜費莫甚於江蘇自

湖南得左宗棠江蘇得王有齡而餉源日裕夫與利莫如去蠹今司計者日言捐餉而鹽漕糧稅凡國家自然之利一任廢弛請下所司議整飭兩廣總督黃宗漢赴粵遷延六月遲不之官城淪於敵巡撫柏貴莫知爲計城東居民殺敵數百柏貴輒爲懸賞緝殺人者貴州巡撫蔣麟遠當叛苗教匪日久鷓張未聞有所措施此皆才力不逮遂使一方塗炭聖主恩威並用尤所仰望歷太僕寺卿通政使左副都御史同治二年署工部侍郎疏薦戶部郎中王正誼守潔才優以忤肅順得罪請復其官報可授禮部侍郎調刑部又調工部五年以疾乞免九年卒

廉兆綸初名師敏字葆醇順天甯河人道光二十年進士選庶吉士授編修宣宗知其賢將擢用以父憂歸遺命諸臣可大用者兆綸與焉咸豐元年服除二
年大考二等三年直南書房四年授右贊善超擢翰林院侍講學士督江西學
政轉侍讀學士再擢內閣學士五年授工部侍郎時粵匪石達開擾江西侍郎
曾國藩率師禦之寇張甚陷州縣五十餘逼會城上命兆綸幫辦廣信饒州防

剿兆綸奏言江西通省募勇計一萬五六千人各不相統屬地方有警勝則互
訐以競功敗則爭潰而不相救甚且擾民冒饟乘便營私其弊不勝枚舉今賊
勢日張瑞州臨江相繼失守設有倉卒以此散而無紀者當之何恃不恐惟有
將所募之勇裁去一切名號併爲三四軍每軍得四五百人統以監司方面素
有威望者庶可責成功六年三月兆綸按試廣信賊陷吉安撫州進據安仁兆
綸上疏請援並以練勇千守貴溪賊竄德興陷建昌廣信勢益孤兆綸督諸生
集鄉團與廣信知府沈葆楨上饒知縣楊昇籌防禦遣上饒諸生郭守謙率鄉
勇三百夜襲金谿諸生曾守誠奮勇先入城賊不虞兵至奪西南門逸克其城
乘勝會攻建昌而饒州又陷官軍敗績廣信益危兆綸與國藩等合疏請截留
閩兵一千六百專攻建昌分檄守謙與在籍道員石景芬防剿六月國藩遣督
司畢金科復饒州兆綸飭景芬守謙等馳攻撫州會賊連陷廣昌南豐新城瀘
溪四縣八月守謙軍撫州張家橋三接皆捷窮追遇伏力戰死時兆綸方赴鉛
山道梗咨衢州鎮總兵饒廷選乞援廷選率兵二千一百至兆綸冒雨穿敵壘

復入廣信共謀守禦寇屢攻不下凡七戰捕斬其渠六斬六千餘級廷選與游擊穆隆阿都司賴高翔等又屢擊破之賊走玉山廣信始解嚴兆綸防守危城盡出俸銀餵軍貧困至不能自給尋以病告歸七年病痊仍直南書房署工部侍郎八年授戶部侍郎調倉場侍郎時軍事方急兆綸疏請責成督撫辦賊略曰今於督撫外另設統兵大員其本省督撫雖有會剿之名其實專爲籌餉之事統兵者往往以呼應不靈餉楮不給漸至遷延而督撫又往往以事權不一供億不資各生意見及至城池失守統兵者無地方之責或邀寬大之恩而未帶兵之督撫轉受其咎名實不符事多掣肘賊氛之熾職此之由臣惟督撫大吏類皆朝廷簡拔之人設其人未盡知兵不妨擇統兵大員畀以督撫之任使之各清各省而責其成功方今川黔閩廣並未另派統兵大員而本境漸就肅清湖南北之專任督撫討賊者轉有餘力助勦鄰境至於江蘇一省統兵者不一而足而潰敗糜爛至今平心而論統兵大員中豈乏公忠體國之臣所以然者抑其所處之地不同用情亦異此其故不可不深長思也清淮一帶實爲

南北要衝漕運總督不兼管地方宜此時權設江北巡撫抑或將漕運總督權改斯缺所有江北各路軍務悉歸統制庶可控扼江淮聲援汝穎不惟江南羣逆絕其覬覦之心即豫東會捻各匪出沒之區亦可斷其一臂矣疏上不報九年英吉利兵北犯疏請以戰爲和十年英兵掠豐登倉兆綸疏自劾上寬之又疏言軍興以來各省兵不足因招募鄉勇比來兵日少勇日增不可不預爲之計此後勇丁如有技藝精嫻戰陳得力者請令統兵督撫大臣即於存營缺額挑選充補軍事既定願歸農者遣散願效力者分隸各標序補額兵上睦之兆綸以交河糧商囤積穀稅遣勇目捕治糧商訴勇目索詐辭連兆綸事上聞命刑部逮問同治元年京察休致二年諭責兆綸在任用人不當奪職銜兆綸感知遇遇事敢言以是多齟齬罷官歸讓產諸弟主問津書院以修脯自給六年卒

雷以誠字鶴皋湖北咸寧人道光三年進士授刑部主事洊升郎中遷御史給事中擢內閣侍讀學士三遷奉天府府丞咸豐元年應詔陳言請任賢能嚴名

實二年復授太常寺少卿屢上疏陳軍事三年遷左副都御史命會同河道總督楊以增巡視黃河口岸迭疏請撫卹在平東平東阿汶上饑民撤山東防河兵省各渡口冗費皆報可粵匪陷揚州以誠自請討賊募勇屯萬福橋扼揚州東南賊窺裏下河以誠屢擊走之通泰十餘城賴以保全授刑部侍郎幫辦軍務與琦善陳金綬會攻揚州以誠分兵駐守要隘焚浦口賊舟屢會諸軍擊賊而揚州久攻不能下諸將以總兵翟騰龍最勇敢足恃詔命授安徽以誠疏言臨陣易將兵家所忌琦善亦以爲言乃留勿遣其冬賊陷儀徵逼連河西岸官軍屢擊走之以誠與浙閩總督慧成合駐軍灣頭六牖未幾賊援至鄉勇潰散琦善奏劾奪官留軍自劾嗣琦善請移灣頭大營以誠與慧成力爭琦善復劾以誠諱飾上責琦善諉過飭以誠仍守灣頭及萬福橋諸隘賊既自揚州退瓜洲時來攻以誠與陳金綬合擊敗之加三品頂戴尋授江蘇布政使屢督礮船渡江會勦攻北固山破其土城乘勝遂至金山敗之六年托明阿兵潰瓜洲揚州復陷詔責以誠等擁兵不援又疏辨冒功爲德興阿所劾職戍新疆以誠

在戍所旱請將軍扎拉芬代奏言江北軍事尋赦還賜四品頂戴授陝西按察使遷布政使入爲光祿寺卿同治元年京察休致光緒五年以重宴鹿鳴還原銜八年又以重宴恩榮加頭品頂戴十年卒年七十九以誠在江北用幕客錢江策創收釐捐錢江者浙江長興諸生嘗以策干揚威將軍奕經不能用林則徐成伊犁從之出關以是知名謁以誠於邵伯留佐幕餉紕江獻策遣官吏分駐水陸要衝設局卡行商經過視貨值高下定稅率千取其一名曰釐捐亦並徵坐賈歲得錢數千萬縑江與同幕五人赴下河督勸不從者曾以兵民間目爲五虎江自以爲功累保獎至道員氣矜益盛以誠不能堪會飲江使酒罵坐以誠執而殺之以拔扈狂肆謀不軌聞後各省皆倣其例以濟軍需爲歲入大宗焉

宗焉

陶樑字鳧鄉江蘇長洲人嘉慶十三年進士選庶吉士授編修纂修皇清文頌十九年林清之變逆黨闖入禁城樑方在館修書其僕駱昇聞警匿樑於書櫥自當戶立賊刃之仆越日事定樑出救之甦仁宗回鑾聞之召樑問狀曰義僕

也賜之金二十一年以知府發直隸補永平調正定道光四年擢清河道署按察使新城縣失過境餉鞘歸罪外委白勳逮訊死於刑上遣尙書松筠侍郎白鎔按治察其枉樑坐降四級捐復知府留直隸十二年補大名知府十八年遷湖北荆宜施道萬城隄決樑復坐降調捐復二十二年補湖南糧儲道調湖北漢黃德道二十八年遷甘肅按察使調山西二十九年遷江西布政使入覲授太常寺卿文宗卽位樑疏言宣宗成皇帝天錫智勇嘉慶十九年八月之變當時但傳發槍斃賊不知首逆林清姓名地址亦山宮中訊得立時遣捕故渠魁不致遠颺餘孽不致滋蔓請勅載入實錄以揚聖武上從之咸豐二年擢內閣學士四年遷禮部侍郎六年以病乞罷七年卒年八十六樑早有文名曾從侍郎王昶助其纂述歷官所至提倡風雅賓接才俊輯畿輔詩傳行世晚登朝右時值軍興耆舊凋落其猶見乾嘉文物之盛者惟大學士祁寯藻與樑二人爲士林所歸仰云

吳存義字和甫江蘇泰興人道光十八年進士選庶吉士授編修二十二年督

雲南學政邊徵士風敦樸存義力爲提倡文風改觀回民煽亂存義按試永昌竟出郭數里城中火起待學使去而始發也二十八年丁母憂歸會江北大水洊饑存義議振躬詣富室勸捐多感其誠出資購米穀存義權小舟散給饑民全活甚衆服闋直南書房擢侍講咸豐五年典試雲南復留督學政士益親之回亂益棘圍會城城中兵闕掠官署民居獨未入學政廨民間婦孺匿考院避難者千入存義在雲南久習知民情比復命奏對陳變亂始末甚詳累遷侍讀學士署順天府丞十年英法聯軍入京師上幸熱河京朝官多挈家出走存義屬疾語家人毋隨人妄動事定敘城守勞將入存義名存義聞之力疾起署牘曰府丞吳存義抱病家居干擾詰姦皆無與今病未愈不敢冒受賞未幾擢太僕寺卿遷通政使署禮部侍郎存義以文廟從祀位次多舛奏請審定繪圖頒行又以諸儒增祀既繁漸失世用其書垂諸國冑之義奏飭中外臣工不得濫請署刑部侍郎同治二年署工部侍郎迭署禮戶二部出督浙江學政軍事甫定人士離散初歸存義寬大拊循歲考既周秀良者始奮於學乃導以經史小

學文風復興三年調吏部留學政任六年任滿以病乞歸七年卒

殷兆鏞字譜經江蘇吳江人道光二十年進士選庶吉士授編修咸豐四年遷侍講直上書房授惠親王子奕詳等讀擢侍講學士命授孚郡王奕詒讀累遷大理寺少卿八年英吉利兵犯天津兆鏞力主戰疏請黜邪謀決大計詆斥主和諸臣甚力擢詹事九年署兵部侍郎詔江蘇諸省治團練兆鏞疏言其弊舉四害言甚切上海欲借英法人助戰兆鏞亦以爲不可十一年丁本生母憂同治元年服除仍直上書房疏言江皖軍威既震大局漸有轉機臣來自災區敢就見聞真切關繫重大者爲皇上陳之一宜飭戎行上海兵勇號稱四萬皆不堪用何以今年經英法人管帶便成勁旅華爾親兵六百盡中國人戰無不勝無他挑選慎約束嚴器械精賞罰信耳請敕將帥講求武備漸事安攘提鎮中如曾秉忠水師通賊焚掠馬德昭掠蘇州上海李定泰掠湖州嘉興向奎每戰輒敗收輒行劫馮日坤部兵掠婦女李恒嵩兵不行劫已共推良將竊謂行師首禁焚掠克城先謀戍守否則旋得旋失民間無子遺矣一宜澄吏治上海諸

官吏惟劉鄩膏得民心已蒙特簡薛煥統馭無能吳煦精心計在上海設銀號
繳捐者非所出銀票不收新授糧儲道楊坊由洋行擔水夫致巨富爲洋人所
鄙浙江布政使林福祥杭州破後降賊送王有齡張錫庚栢至上海臣意此等
倖員宜分別懲創稍申憲典一宜清釐餉款上海左近官卡賊卡槍船卡林立
卡稅之外釐捐月捐船捐畝捐房捐日增月益臣聞官吏紳商皆云日可收銀
二萬月得六十萬兵勇四萬人日餉三錢月止三十六萬而當局猶入不敷出
請勅曾國藩李鴻章嚴密清釐蘇松嘉湖賦額甲天下近三十年年獨緩官
民交欠賦成虛額見經大亂田荒戶絕可否俟軍務大定敕督撫覈計酌留商
稅核減農賦以羨補不足勿踰定則一宜撫卹遺民江浙交界秀民設槍船所
至焚掠此輩視官兵盛衰以爲向背克復時必爲內應請敕督撫從宜處置或
令歸農或籍爲兵勿貽後患至失守郡縣陷賊士民商賈苟非出自甘心僅止
偷生畏死可否援脅從罔治之義乞恩原宥一宜防維外人上海孤城克保不
得謂非外人之力自經助勦所向無前或云實出義舉或云欲通商販或云日

後恃功索償臣俱不敢逆億各處通商尊奉外人太過猶幸我國新政清明未萌覬覦日久相習利權盡歸人情益附而謂狼子必無野心實難深信撫御得體尤在博知外情請敕各口通商衙門譯述各國新聞有關時事者書記大則奏聞藉資豫備上以所陳不爲無見下國藩鴻章等籌畫並將福祥等察劾按治尋授詹事遷內閣學士迭署兵禮諸部侍郎四年編修蔡壽祺疏劾恭親王命大學士倭仁等察奏兆鏞與左都御史潘祖蔭疏言恭親王輔政以來功過久蒙睿照重臣進退關繫安危尙祈持平用中熟思審處察其悔過予以轉圜庶無紊黜陟大綱滋天下後世之感上納其言六年督安徽學政七年授禮部侍郎任滿仍直上書房迭署兵工二部侍郎尋授吏部侍郎調戶部再調禮部七年以病乞罷九年卒

論曰咸豐中四方多故文宗愷恒抱疾京師用不足大錢鈔票法立弊滋王茂蔭屢進讜言均中利害清直爲一時之最宋晉亦其次也袁希祖文瑞皆有論列而徐繼畲直箴君德所舉三防陳義尤高發桂言軍事亦有識廉兆綸

助守江西雷以誠分防江北並著事功陶樛爲文學老宿吳存義殷兆鏞並侍
從清望存義視學滇浙能得士心兆鏞慨慷論事於鄉邦疾苦冀有補苴何言
之深也

清史稿

列傳二百十

宗稷辰

尹耕雲

王拯

穆輯香阿

游百川

沈淮

宗稷辰字滌甫浙江會稽人道光元年舉人授內閣中書充軍機章京遷起居注主事再遷戶部員外郎咸豐元年遷御史疏請飭各省實行保甲略言州縣宜久任時日宜寬假填寫門牌當詳細核對董事胥役毋派費累民酌用丞簿以爲襄助先編巨族以爲聯屬並可申明讀法之典兼收團練社會之益詔下直省督撫各就地體察參酌行之又疏言通籌出入宜崇實去僞舉清查報效生息三端又疏請酌改經徵處分令州縣戴罪嚴催並下戶部覈議五年間上將謁陵未有旨戒行稷辰疏言畿南州縣被水連歲用兵民氣甫行休息籲請展緩一年上諭曰每歲謁陵事同典禮如果畿輔民力未逮亦必權衡時勢暫緩舉行今茲並未降旨何日謁陵宗稷辰揣度陳奏徒博敢諫之名而無其實

此風不可長下部議處尋又奏言自粵匪竄據長江數年以來文臣武將能戰者希如烏蘭泰塔齊布江忠源皆難得之將而多不盡其用以死且殉如勝保張亮基袁甲三皆勇於任事而亦未盡其用以罪罷去近日支持兩湖賴有二書生如胡林翼羅澤南能以練膽爲士卒先此二人者實曾國藩有以開之此時若開文武兼資一科誠足濟當時之急而臣工多不敢薦舉者一恐其才疏而得過一恐其遇蹇而罔功處愁眉焚頂之時守蹈常習故之轍見有敗劄動以饑饉爲辭饑固不可不籌試思用兵乏人雖歛金百萬棄如土苴終歸無用臣聞見陞陞非能盡識天下之才所知湖南有左宗棠通權達變爲疆吏所倚重若使獨當一面必不下於林翼澤南其屢經論薦難進易退肝膽經術實可取材者有若湖州之姚承輿其策議深沉才識過人者有若常州之周騰虎管晏桂林之唐啟華皆關心時務今尙鬱鬱伏處田間誠能破格招賢連茹並進則得一人可以平數州得數人可以清一路長江雖阻當不難分道建功剋日平定伏乞皇上命內外臣工各舉所知無論已仕未仕果能文武兼資皆許

徵起必可網羅而盡得之疏入下各督撫命以宗棠等加考送部引見宗棠自
此廣簡拔論者謂其知人選給事中時京師行大錢商民苦之稷辰上疏請復
用制錢號曰祖錢而大錢改純用鐵鑄兼行並用下部議格不行又以畿輔水
患疏請急振從之尋授山東運河道捻匪入境於濟甯牛頭河濱築戰牆北岸
六千三百丈南岸八千六百丈賴以守禦以功加鹽運使銜同治六年引疾歸
尋卒稷辰父霈正官湖南陵零知縣廉無餘資稷辰事母孝爲學宗王守仁劉
宗周能官後主餘姚龍山書院山陰蔽山書院官京朝請祀總兵葛雲飛本籍
官山東請修方孝孺祠並刻正學集其振勸風教多類此

尹耕雲字杏農江蘇桃源人道光三十年進士授禮部主事再遷郎中咸豐五
年粵匪犯畿輔惠親王綿愉爲大將軍僧格林沁參贊軍務辟耕雲佐幕府上
書論防務爲文宗所知八年授湖廣道監察御史署戶科給事中時方多事封
章月數上直隸總督訥爾經額坐貽誤封疆罷復起耕雲疏言訥爾經額之罪
天下共聞共見未喻其復行起用之故方今江淮楚豫軍務未靖秉銀之臣星

羅棋布所以奮不顧身必欲滅此朝食者固由篤於忠義亦以國家信賞必罰有以畏服其心萬一效尤解體患何可言昔宣宗起用琦善以陳慶鏞之言而罷伏願紹述心傳收回成命時粵匪復窺武漢耕雲疏言武漢地踞上游北窺關陝南脅湖湘東撼吳越西制巴蜀自古南北用兵皆出死力爭之今賊窺伺楚北分擾廣濟黃岡逼近省城撫臣胡林翼兵勇數千衆寡懸絕江路懸遠首尾不能兼顧侍郎曾國藩忠勇樸誠應請授爲欽差大臣率其所部援湖北較諸他臣事半功倍粵匪陷定遠耕雲疏言定遠失守粵捻新合必謀北窺恃山東爲之屏蔽撫臣崇恩幸其不戕官據城於賊退後虛報勝仗內則巧爲彌縫掩一人耳目外則恣其賸削竭萬姓脂膏惟懇俯念藩籬重地立予罷斥簡大員往代於洪湖多募水師兼飭傅振邦全軍移駐固鎮靈璧翼收皖北以固山東及廬州失守又疏言昔人建省安慶與九江江甯爲犄角控扼長江上年徙治廬州已失形勝茲並廬州亦不能守胡林翼等自武漢進逼九江而安徽之賊或自英霍走湖北牽我上游或自徽歙擾浙西窺我腹地我軍分道救援罷

於奔命賊有四達之路我無三面之圍雖日克一城何益撫臣福濟屢挫損威
候補京堂袁甲三素得民心如以爲巡撫必奮身圖報及國藩進師疏言軍興
以來征調半天下糜餉數千萬卒未能掃穴擒渠則以屢後時而數失機也今
曾國藩蓄養精銳所向克捷陳玉成張洛行率悍賊數十萬齊向潛山太湖抗
拒衆寡之數十倍於我一有疏虞關繫甚重此時廬鳳六合賊勢必單請袁甲
三張國樞刻期擡其巢穴逼令反順或令間道爲楚師聲援亦足視其狂魄別
疏劾河道總督庚長請以甲三兼攝又論雲南回匪不宜專意主撫又陳京師
本計平糶探買賙恤蓄積諸事宜並舉又言錢法積弊諸疏多見採納英法合
軍犯天津耕雲專疏者七會疏者二力主決戰上命王大臣集議與鄭親王端
華等議不合耕雲抗辨痛哭而罷耕雲初在禮部肅順頗重之及是爲所憎九
年科場獄起以科道失糾下吏議而耕雲以充內監試讀獨重鑄二級調用十
年京師戒嚴上將幸熱河耕雲代團防大臣草疏諫阻復自以書抵肅順卒不
聽侍郎文祥提督九門遇耕雲東城相持哭因爲規畫留守諸事胡林翼疏薦

耕雲胸有權略請起用會副都御史毛昶熙治河南團練疏調從軍同治元年率部卒五千從僧格林沁平金樓寨教匪又偕提督張曜克張岡捻巢以道員記名賜花翎三年署河陝汝道西征軍購糧陝州市斛小賈屬縣償其不足凡數百萬斤耕雲悉請罷之客軍有不法者斬以徇境多刀匪請得節制河陝兵饋餉以時兵咸用命四年張總愚犯畿輔耕雲從巡撫李鶴年進軍磁州建策築長剛斷賊歸路兩署糧儲鹽法道佐治善後事濬惠濟河塞河決叙勞加布政使銜十三年補河陝汝道河陝徭役重亞於常賦耕雲立定制嚴稽覈民困稍甦光緒三年大旱條上救荒七事未及行卒於官耕雲在言路著直聲出任監司巡撫張之萬李鶴年皆倚重之軍事多所贊畫卒後巡撫李慶翱以災荒被劾牽及冒領兵餉事辭連耕雲後終得白云

王拯初名錫振字定甫廣西馬平人道光二十一年進士授戶部主事充軍機章京大學士賽尙阿視師廣西以拯從拯感時多難慷慨思有所建白咸豐間自郎中累遷大理寺少卿同治二年降捻宋景詩由陝西還擾直隸山東拯奏

言景詩岡屯甄圩儼然岫固自陝逸回其黨不過數百崇厚等一再養癰裹脅
逾萬近復於昌邑莘聊城臨清四州縣令村莊將所獲麥與佃戶平分運送岡
屯是其名爲降伏心迹轉益凶悖請密敕直隸督臣劉長佑計調來營暴其罪
而誅之若抗違不至直隸官軍猶能越境近剿景詩既除如楊蓬嶺程順書等
首惡皆可駢誅以除巨慝以安畿輔疏入未行其後景詩卒以叛誅軍事未定
曾國藩議於廣東籌餉勞崇光創辦釐金諸弊盡起拯疏言兩粵爲肇亂之區
岑溪容縣數載皆爲賊踞信宜陳金缸尤爲巨慝羣賊相爲一氣滋蔓難圖勞
崇光舉辦釐金率令紳商包充墊繳然眉剝肉事何可常及崇光去任徵收減
少近乃有釐務委員或爲衆所毆傷或爲民間枷號雖民情頌穰而官吏惡劣
亦可概見以積年久亂之地有負岫圍視之賊當一切利孔百方搜剔之時臣
竊恐利未十而害已百萬一兩粵復糜爛更不知何所措手足豈惟釐金不能
辦而已因薦廣東道員唐啟蔭兩淮運使郭嵩燾浙江運使成孫詒旋用嵩燾
督廣東釐金自拯疏發之也三年遷太常寺卿署左副都御史疏論總理各國

事務大臣侍郎崇綸恆祺董恂薛煥委瑣醒寤通國皆知竊恐外邦輕侮以爲中朝卿貳之班大都不過如若曹等未免爲中朝恥辱就令人材難得或於總理衙門位置爲宜上應量爲裁抑或處以散職或畀以虛銜庶外邦服我旌別之嚴四方聞之亦釋然於朝廷宥納羣倫驅廢彼族之意尋遷通政使仍署左副都御史疏言近日蘇杭迭克直東肅清臣觀從來將興之業垂成之功未有不失以小心而始能底定者金陵賊窟雖計於三四月間可拔而丹陽與常州犄角百戰悍賊如李秀成等麀集死守杭嘉旣克餘黨歸併湖州其自皖南竄越江西之賊蔓延玉山鉛山金谿建昌二三百里衆號八九萬並有闖入福建境者又聞李世賢自率巨股由淳安遂安接踵而至曾國藩左宗棠等用兵日久前此屢陳不亟求功旦夕同一老謀深計獨於皖浙毗境豫作防維之策則國藩意在微審各飭所部分防宗棠以爲不若併力取廣德扼賊竄路兩議未及定賊已由皖竄順賊又草竊已久人數太衆勢多不能聚殲而弗使一賊他遁臣則以此賊人多勢劇一意奔突前股未痛勦後股又踵接萬一深入江西

腹地燼餘復熾又至燎原且由贛踰閩可以直走汀湖爲數年來竄匪熟路黃文金由此而來石達開由此而去前事可爲深鑒豐黎諭旨曾國藩左宗棠李鴻章沈葆楨及閩粵各督撫諄諄戒備當此大功將竟惟當併力一心互籌戰守務將分竄諸賊前截後追必使所至創夷日就衰殘零落不得喘息以成巨患臣尤有請者皖浙諸軍與賊相持不爲不久所需餉項國藩宗棠等各於江楚等省自爲籌畫國藩奏於江省設立總臺以一省捐釐之數爲皖軍十萬養命之源浙軍固不能分撥即國藩所部月餉傳聞亦祇放數成不得已而籌及廣東釐捐乃又不能遽辦夫民之不能見遠而各爲其私者情也廣東有之江西豈獨不然日前沈葆楨奏請將江西茶稅牙釐等款歸本省任收旋用部議允留其半在國藩等斷不至缺望惟軍前將卒當枕戈喋血切望成功之時忽聞軍餉來源將減衆心或生疑懼何以得飽騰而資鼓舞擬請飭贛皖楚粵各副臣值此事機至緊無論如何變通爲難總當殫竭血誠同心共濟甘肅回氛未戢中州餘捻尙存汝南陳大喜等竄逸湖北自隨棗襄樊張總愚自南台

山中出竄內浙時虞合併漢中之賊全竄甯陝商州一路聞將會齊襄樊回接
金陵誠亦未可輕忽日前陝省軍務政出多門李雲麟追賊商於忽捲旆而西
其在興安未能遏賊竄逸其在漢陰遇賊避匿縱勇淫掠宜量加裁抑劉蓉素
嘗學問懷負非常漢中之賊本所專辦而竄擾四出尤當誓志盪除方爲不負
多隆阿聲望最優衆口爭傳爲第一名將乃近日聲望漸損宜申聖諭訓飭雷
正綰所向克捷諒足當一面之寄顧全甘官吏未有一二正人之持其間現聞
蘭州與慶陽隔絕恩麟權督印不過使令便辟之材職見陋劣熙麟坐守慶陽
寧夏一區又爲慶昫種種紕繆所誤臣愚以爲亟宜選簡公正有爲之大臣領
撫整飭今之天下何易遽言率土奠安而南北軍務漸定西事再能就緒亦卽
爲大致之澄清朝廷者天下之本宮府清明嚴肅與疆場奮迅振拔之氣相感
而自通天下大勢日轉而亦正多難鉅之事或遽以爲時局清明事機暢遂若
已治已安者然人情大抵喜新狃常畏難而務獲獨有當幾至誠君子爲能深
察而切戒之昔諸葛亮爲三代下一人史獨稱之以謹慎朱子進戒宋孝宗曰

使宴安酖毒之害日滋而日長將臥薪嘗膽之志日遠而日忘臣不勝私憂過計冒昧瀝陳疏入報聞尋告歸卒

穆緝香阿字居南滿洲鑲紅旗人由工部主事再遷郎中同治四年授山東道監察御史疏請慎擇宦寺略言皇上冲齡御極聖學日新知識日開左右侍從之輩宜豫加慎選勿使將來疊感聖聰溯自漢末及前明朝政之失半由宦寺蓋宦寺出身之始每以小忠小信便捷逢迎無非售其固寵邀恩之計及黨與已成則驕肆專橫而箝制其上雖英明之主竟有百計不能除之者當時臣民切齒痛恨終歸無可如何我朝列聖相承遠邁前代不但不準此輩干預政事雖應對進退間亦不假以辭色使無由譏諂面諛浸潤膚受是以二百餘年從不爲患雖然如此嚴防尙有防不勝防之慮嘉慶癸酉之變猶有通賊者此輩反覆已有明徵也今皇太后垂簾聽政洞悉其弊杜漸防微有鑑於前不使宵小蒙蔽所以知人善任朝政肅清即數年後皇上親政亦斷不致寵任此輩貽誤事機何待臣下鯁鯁過慮然獻曝之忱有不能已者當此之時正聖學擴

充之際雖臣工皆能盡心輔佐而宦寺尤宜加意斟酌臣以爲宦寺之設無非效奔走供指使而已萬不可使年輕敏捷之人常侍左右請皇太后選忠正老成者爲我皇上朝夕侍從庶將來親政必不致受其欺蒙惑而無疆之聖德基於此矣五年疏論大學士曾國藩督師討捻日久無功請量加譴責上以國藩迭疏引咎特命回任專辦餉糈雖未蕙全功非貽誤軍情者可比斥所奏過當置不議出爲山西蒲州知府尋卒穆緝香阿通知國故家藏邸報自國初以來幾備

游百川字匯東山東濱州人同治元年進士選庶吉士授編修六年遷御史巡西城宗室寬和等所行多不法奏劾懲治一時貴近斂跡七年捻匪自山東竄直隸百川奏請飭統兵大臣迅速勦辦又請嚴禁各省栽種罌粟上皆採納疏論內外官署胥吏積弊詔通飭嚴禁復言除吏弊在肅官方尤在揚士氣請飭部院堂官於每司中擇賢隸數員付以事權專其責任察有胥吏舞弊據實上陳仍以勤惰定功過賞罰既明人才自奮至外省地方官本有懲治胥吏之權

嚴飭各督撫爲地擇人毋以人試地舉賢効不肯再簡廉正大員以時巡察遇有貪官蠹吏列狀奏聞黃河北徙山東郡邑屢被水百川疏請賑卹河督文彬巡撫丁寶楨請仍挽復淮徐故道命廷臣集議百川疏言黃水宜南宜北必將折衷一是如議挽復故道論工程論經費引黃濟運有未可遽定者三端如即以大清河爲黃水經流舊道斷不能容河面必須加寬民間田廬如何移徙如何安置則度地宜審也且卽河面加寬仍恐萬難容納別開支河勢不容已徒駁馬類鉤盤隔津猶可指名可否開行有無貽害則分水宜權也黃水北行其事爲創萬一不善料理人情騷動物議沸騰則相機宜慎也請特派大臣履行上下游詳勘然後定策十二年上親政命葺治圓明園奉皇太后駐蹕御史沈淮疏請暫緩修理上特諭宣示孝養兩宮之意專修安佑宮供奉列聖御容暨皇太后駐蹕之所治事之地量從節儉不事華靡此外均不必興修百川繼疏申諫上召入詰責百川侃侃正言無所撓上爲動容一時敢諫之名動朝野尋以憂歸服除補官遷給事中光緒五年出爲湖南衡永郴桂道遷四川按察使

擢順天府尹遷倉場侍郎九年山東河決被災者數十州縣命百川往會巡撫陳士杰治工賑百川輕騎周歷河南北岸上下游先散急賑會奏請築兩岸遙隄復於其內築纒隄使黃水不致泛濫又奏請濬小清河分黃水入海如議行還京以倉廩被火罷歸居數年卒准字東川浙江郵縣人道光二十九年舉人授內閣中書充軍機章京咸豐十年文宗狩熱河淮不及從慟哭欲投井家人守之不得死遷刑部主事進員外郎授陝西道監察御史疏劾戶部主事楊鴻典攬權納賄下刑部逮治僅以小過議鑄級及閩敬銘爲尙書始奏劾譴黜園工興淮疏首上當時與百川齊名光緒元年充順天鄉試監試力疾從事出聞旋卒家固中人產官京師斥賣殆盡人尤服其清節

論曰用兵之際事機千變京朝官以傳聞有所論列往往不能切中宗稷辰歸重得人尹耕雲論諸將帥罪王拯請調和疆吏一意辦賊爲能見其大拯所言尤詳盡蓋直樞廷見軍報較得諸傳聞者異矣穆緝香阿請慎選宦寺游百川等阻修圓明園嘗負直諫名良不虛也